

駐

粵

八

旗

志

駐粵八旗志卷二十三目錄

人物志

文學列傳

榮年

全德

博敦

雙齡附

恭承

兆麟

郭仁太

壽祺

江淵

毛西贍

李士期

李承業

趙權

樊夢蛟

屈元彪

宋爾炯

子雲瑞

謝秉仁

丁禮

魏廷賢

李文蔚

施良

章世封

古元德

弟庸德

崔廣文

崔廣祥

韓國斌

李蘅芳

黃易庸

劉芳

樊圻

弟屏

樊封

子鍾彥

張慧

吳起燄

官世剛

朱洽

趙國政

張廣恒

紀秉鈞

高仁

高榮

保天福

保熊升

劉彥昌

唐暄

李樂

李德峻

郭殿雄

賽豪

董茂泰

陳守健

陳廣祥

醫術列傳

崔東嶺

崔君培

張如芸

朱霽

袁綬

王廷相

楊廷耀

技擊列傳

井滿

張茂德

李茂揚

郭士琳

貞壽列傳

于氏

王氏

王氏

閆氏

孝烈列傳

二玉

瓜勒佳氏

孟佳氏  
溫氏附

瓜勒佳氏

余呼魯氏

伍氏

馬氏

林氏

小美

孟氏

張氏

倪氏 六姐附

十七姑

李氏

于氏

光緒十年續修文學列傳

劉彥揚

劉士忠

駐粵八旗志卷二十三

文學列傳

榮年滿洲正藍旗人原名永甯避

廟諱改今名乾隆中其祖善德令惠州之歸善縣時年甫  
十齡隨侍任所及善德卒父玉慶以甲兵就近駐  
粵遂家焉榮年弱冠通繙譯充印務外郎一切情  
文章奏公牘多出其手將軍李侍堯優禮之會設  
左右翼官學卽命爲左翼教習其教人隨其資之  
敏鈍以課之生徒學業多所成就尤加意單寒義  
學教習張慧其高足弟子也子特克慎亦能紹其  
學爲左翼官學滿洲八旗義學教習孫烏珍布以

繙譯生由軍功官防禦吉勒占由繙譯生官驍騎校

全德滿洲鑲紅旗人乾隆間由天津移駐廣州家貧篤學尤嫻

國語於清漢五經及古文淵鑑皆背誦如流將軍李侍堯使爲右翼官學教習全德乃嚴學規定課程師生問答悉操

國語後來宿學之士皆其所傳百餘年來教澤猶未泯云子懷福官防禦

博敦字子才滿洲鑲黃旗人年少能文以擢前鋒不得應文試遂專意



國書爲左翼官學教習幾二十年將軍蘇勒芳阿宗  
室鎮國公奕湘甚賞識之與繙譯教習雙齡爲文  
字交雙齡字聰軒滿洲正白旗人以清文啟蒙一  
書爲學者入門之基與博敦共相叅訂添附新義  
重以授梓焉

恭承字寅齋滿洲鑲黃旗人恂恂儒雅道光元年  
受知於學使顧元熙取入郡庠戊子鄉試揭曉之  
夕巡撫成格爲監臨語同列謂駐防開科十餘年  
何此間滿洲諸生無一中者及書榜至第二十名  
得旗卷視其名籍則滿洲恭承也監臨大以爲快  
一上禮闈不第歸未幾遽卒年三十餘

兆麟字虞郊滿洲鑲白旗人爲人蘊藉精楷法屢試高等不中由廩生選恩貢生年四十餘遂絕意進取家居以文史自娛滿洲文學之士兆麟與郭仁太其最著也

郭仁太號春舫滿洲鑲藍旗人歲貢生有文行主講八旗義學教人以孝弟爲先文藝次之士林中每語及之無不尊稱之曰春舫先生一時名流如南海朱次琦潘斯濂輩皆與訂交焉事母至孝母嗜食蠮及母卒家人具餐偶以蠮進輒廢箸涕泗交頤由是其家遂絕不食蠮生平無他嗜好獨喜彈琴閒亦與詩人樊屏諸人倡和臨終自作輓聯

云處世無濫交比匪之傷今知免矣終身不二色  
維難之戒其庶幾乎卒年六十餘子塔爾漢今官  
防禦

壽祺字執之原名阿克敦太號竹村郭仁太之弟  
也年弱冠補諸生將軍鎮國公奕湘甚器之性和  
雅讀書之暇閒涉書畫生平好周人急年未三十  
遽卒著有繡虎山房吟草

江淵字子岷漢軍正白旗人秋溪其自號也好讀  
書尤工於詩額駙福增格爲將軍聞其名延掌記  
室優禮甚渥而未嘗妄干以私粵商沈梅臣者啟  
詩社於其別墅之白燕堂以沈香浦荔枝灣等諸

名蹟爲題各賦近體律詩聘南昌萬承蒼編修評  
定甲乙擢梁弋雲等三百名淵名居第六學使東  
吳惠士奇選古學探奇集淵與毛西贖作採錄獨  
多生平兼擅倚聲歿後門人韓矩取其秋溪近稿  
半野園詩餘刊行於世

毛西贖字雲幢漢軍正白旗人生時母夢頭陀入  
室及長篤嗜內典偶夏日遊海幢僧方曝經滿院  
西贖隱身經函俯首翻閱一僧呵禁之西贖睨之  
曰此佛說度世經汝輩不能讀反禁檀越讀乎首  
座覺其語異禮之就座與叩疑義語皆抉竅要首  
座起膜拜請爲講華嚴大義一時聽者戶牖皆滿

詩宗唐人仁和杭世駿主講粵秀書院西贖以詩  
爲贊一見傾倒跋其卷有清傳天籟響遏羣囂之  
目晚居戒壇閉門弗與物接閒與番禺車騰芳鍾  
獅輩往還乾隆乙丑歲大雨白雲山水盛漲自北  
門入水及屋簷居人紛紛逃避西贖獨乘筏至北  
水關墻巔書某年月日山潦灌城水痕至此十餘  
字以誌災異水急筏散墜水幾死其清狂好異多  
類此年近七十預知逝期無疾而歿

李士期字尙志晚號漁南布衣漢軍正白旗人豐  
頤秀目詩以清峭刻削見長後順德黎簡得其稿  
歎爲清才摘集中佳句收入求友編

李承業字復初漢軍正黃旗人軀幹雄偉工騎射  
好讀書學爲文復學爲詩嘗得前明詩人張東所  
看竹亭故址構廬其間有句云風流不作成千古  
看竹今須問主人與故人白下李煌時作羅浮之  
游其卒煌輯其守志堂詩集四卷序而刻之

趙權字達夫漢軍正紅旗人性通脫好爲詩袁子  
才隨園詩集初至粵大愛好之寒夜以詩向友人  
乞酒用東坡尖叉韻凡七八疊一時倡和多至百  
人曰百朋角韻集頗稱於時

樊夢蛟字得雲號恭巖漢軍正白旗人家貧訓蒙  
贍親謂駐防百年無一人由科目進身爲可恥事

乾隆丙午徒步赴京應童子試以閱射愆期未獲  
考歸益奮志經史巡撫尙安觀風試士夢蛟文列  
優等將軍福昌聞其品學延課其孫且爲納粟入  
監嘉慶庚申

恩命各駐防旗人由該省就近童試遂牒辭監生復應童  
試以經古文筆受知於學使姚文田取入郡庠連  
試弗售年七十五卒夢蛟資性方嚴質直其弟子  
應對皆有禮法戚好中有急難者傾身赴之與人  
談及不平事拍案嚼齒鬚髯奮張耽嗜風雅與香  
山黃培芳番禺趙古農相倡和先是北闈報罷歸  
次南昌資斧垂罄附一商船行數日商擁爐得句

云三更客入夢中夢下句屢思未就夢蛟隔艙爲  
續之云一箇人行江外江商大驚延之人座呼酒  
對酌臨別訂交並餽以資夢蛟晚年每舉以告人  
且曰往時商賈類有士夫之風近日士夫類有商  
賈之行語雖過激然亦切中時弊矣所著有訓兒  
編一卷聽雷書屋詩文集十六卷恭巖札記二十  
卷燕遊紀程三卷子五人長子圻附生次子封

恩賜副貢生三子屏附生孫鍾秀癸卯舉人太湖同知

屈元彪字嵩阿漢軍正紅旗人性夷曠精繙譯爲  
八旗清書總教習課講之下以詩酒自娛著有梧  
軒詩草一卷子廣業弱冠補諸生早卒



朱爾炯字燮齋漢軍正黃旗人諸生父疾篤醫藥罔效潛刺臂肉雜羹湯以進遂痊好書學小楷得二王法大字勁健粵秀山應元宮三字其所書然非得意筆也達官某耳其名延入署出紙求書命僕人曳紙僕人偶違其意遂投筆不復書其兀傲如此間爲篆隸亦渾古晚年築樓於流花橋側時載酒呼友人歌詠其上著有礮刼錄記辛丑海疆事甚詳子雲瑞辛丑軍功

賞戴藍翎官正紅旗防禦能詩古體尤佳

謝秉仁字景山漢軍鑲白旗人諸生性豪爽字法唐人圭峰禪師碑精

國書好吟詠每同人雅集酒酣諸人競發言論秉仁  
別占胡床高唱漁洋山人秋柳詩聲調抑揚字字  
合切律呂諸人聽之皆神爲之往嘗夜行於道拾  
得一囊有鈇釧數事知爲人遺失守候之果有老  
婦踉蹌籠燈而至因舉以還之年六十餘卒孫蘭  
馨繙譯舉人

丁禮字履初漢軍鑲白旗人 恩貢生父老病痿  
卧起需人禮晝夜扶持飲食便溲事必躬親積年  
無少倦居喪毀瘠禮少有文名長身炯視所居室  
洒掃無纖塵一棉布襖數十年不易父卒後多病  
不復就試亦不出里門好飲酒酒盡必自行酤雨

中則戴笠著屐竹杖携壺以出年七十餘卒子德源今官協領

魏廷賢字完珍漢軍正黃旗人習繙譯好爲詩天分不高而少陵草堂集皆能上口城西元妙觀高榕蔽天有蘇學士泉爲東坡南遷遺蹟每歲暮諸學究散學徒皆日集其閒爲對社其例舉一人爲主師一人爲謄錄主師出七字上聯命衆屬對每對投錢六文主師判其甲乙社主取其錢分多寡與之謂之謝教才人適興紛然而來嘉慶閒臬使吳俊微服覘之試投一語輒冠其軍謂將軍曰對社雅集不讓雅歌投壺也廷賢常爲社主焉

李文蔚字明江漢軍正黃旗人道光壬午舉人一試禮闈卽絕意功名課徒自給所居齋前種竹數十竿客過淪茗清談或圍棋夜分始散長子潤次子海及孫思敬皆舉人

施良字夢臣漢軍正黃旗人長身玉立爲文操筆立成與朱霽徐榮讀書六榕寺中嘉慶丙子三人同舉於鄉是科爲駐防旗生本省應試之始襄平相國蔣攸銑時爲總督三人者皆少年英彥亟賞識之期以遠大良質素羸感國士之知攻苦過甚癸未歲計偕入都榜未發卒於京邸年甫三十餘妻余氏撫孤守節建坊

旌表

章世封字仁山漢軍正黃旗人嘉慶戊寅

恩科舉人六赴禮闈不第遂絕意進取閉門讀書客至煮茗清談而已閒與其婦對奕婦圍棋高品文彬女也年五十餘卒子振采甲子舉人

古元德字階平漢軍鑲黃旗人家貧力學及壯未有室徐榮之母謂榮聞古生能力學必不終貧吾欲以汝仲姊歸之元德聞之遂委禽焉道光乙酉舉於鄉三上春官不第歸而授徒八旗文學之士半出其門生平練達時務當道有疑難事多就咨決晚主講八旗義學卒年六十餘其仲姊甚孝矢

志不嫁勤女紅助弟養親弟庸德字太初諸生淡  
於榮利家庭之內怡怡如也精書法魄力雄偉元  
德子琳監生孫贊賜諸生庸德子環諸生瑛武生  
崔廣文字書農漢軍正白旗人少穎異家貧父岱  
常拮据供使讀由是愈奮志勵學年甫二十卽領  
嘉慶己卯鄉薦以親在不欲遠離庚辰一踏禮闈  
後卽養親不出居家教授恒數十百人弟子入詞  
垣登顯仕者先後甚衆從弟廣慶廣祥道光辛卯  
同舉於鄉皆自幼從受學者也已亥吏部銓期到  
班友人有勸赴選者笑而不應父卒經營窀穸凡  
數載始得吉壤焉卒年五十五同年花縣駱文忠

秉璋嘗稱其孝友可風云著有寄閒堂時藝行於世長子華今官防禦次子坊三子楨孫永安永明皆入郡庠

崔廣祥字靄堂湛次子廣文從弟也母早卒事繼母如所生從廣文學天資甚高文筆清俊未弱冠補諸生肄業粵秀書院山長吳縣陳鍾麟甚賞識之道光辛卯與兄廣慶同領鄉薦三上禮闈皆以額滿見棄既以父年老遂不復會試精岐黃術當道延請一時有良醫之稱甲寅髮逆事起慨然與紳士請於將軍添設團練旗丁並勸有力者助資開局數日事成而賊亦大至團練兵隨同大兵合

力攻勦屢戰屢勝賊衆奪氣廣祥知賊不足慮遂  
誘其事於諸人不復與賊平當事者將列薦章復  
婉辭之生平喜談諧好排解有東方魯連之風年  
五十卒子玉湖南候補同知桐廣西候補同知孫  
永年諸生

韓國斌字質然漢軍正白旗人性篤厚專精繙譯  
生平未嘗釋卷道光甲辰駐防改試繙譯設立義  
學首延國斌爲師盡心教誨弟子得其傳者率聯  
捷成進士而國斌晚年所造亦愈精副都統庫克  
吉泰夙擅繙譯以近人所撰廿一史約編甚便初  
學而未有清文命國斌與張慧繙譯國斌虛心講



求凡數年始成書識者服其精當焉年七十餘無疾卒於義學講席子世松辛酉科繙譯舉人

李蘅芳字湘生漢軍正黃旗人道光戊子舉人性坦直與番禺杜蘅香山鄧大林輩爲詩酒之會年五十餘卒精篆刻嘗以西洞端硯自鑄篆銘獻於座司座司答以詩有銀刀蓄雨勢丹篆寫春痕之句由是其名著於時云

黃易庸字守中漢軍鑲白旗諸生苦貧力學爲越華書院山長劉編修彬華所賞易庸終身執弟子禮甚至彬華卒葬日大雨衣冠送葬者皆趨避旁舍易庸獨冒雨至葬所道光乙酉舉於鄉年五十

餘卒

劉芳字香谷漢軍正黃旗人與弟華同道光辛巳恩科舉人性簡率經月不薙髮短衣破履客至亦然生平篤好制藝取前明及

國朝諸名家文與傳註有相發明者或一比或全篇一一纂錄之楷字如蠅頭積至十餘櫥其所爲制義亦不墮時趨年幾五十卒

樊圻字虎臣夢蛟長子與弟屏同爲諸生喜稗官叢說文筆小品冷隽有致屢試弗售放懷詩酒與友人結詩社年未四十卒有柳圃吟草此聲集新年雜詠絕句醉鄉日月記若干卷屏字甸侯性質

直貌癯而長喜談舊事詩亦孤潔自喜晚年與友人結隨緣社觴詠時集所著有老兵閒談四卷清嘯堂吟草若干卷

樊封字昆吾夢蛟次子也少倜儻爲諸生博涉羣書不屑屑爲制舉業負其才氣有不可一世之概院試誤坐他號役人呵之遽執其人見學使謂非待士禮學使謝之不退請必面杖之學使大怒謂藐視師長立褫之故太傅阮元道光初督粵建學海堂以經史詩賦課士封甚荷賞識使纂輯

三朝御製詩註並分校

皇清經解爲援例入太學前大學士翁心存爲學使

時錄送科舉面試策問所對太學事原原本本學使錄入校士錄中由是聲譽益隆熟於

國朝掌故戊子鄉試已取中矣以對策引

紫光閣功臣畫像一一枚列主試者慮有舛誤懼遭磨勘置之入都赴京兆試游歷南北名勝嘗出居庸關周覽塞外形勢客臨安遊天目山值大風雪山中雪深沒膝衣裘霑溼得寒疾幾殆其好奇如此所至與名流訂交居京師時公卿皆折節下之高麗使臣金進洙聞名造訪乞其詩以歸其國之大司徒申緯駙馬洪顯周皆撰句寄贈其爲遠人所傾慕如此連試不售購

武英殿板書數千卷南還會刑部尙書祁墳奉

命督粵延封與南海曾釗輩同在幕中用封策築隄虎門外捍海潮圍沙田二百餘頃召佃耕墾置虎門同知領之取其租給軍儲焉咸豐甲寅土匪事起封請於將軍選八旗丁壯千五百人協同戰守又選八旗精造火器者開局製造事平奏

賞通判銜七年十一月英吉利法蘭西突合攻省城占踞粵秀山城中大震其酋巴嘎哩入將軍署強邀將軍穆克德訥赴粵秀山議和握將軍袖以出封適在署中怒叱其無禮會愕然以刃擬之封挺身迎左右急掖之乃免遂與印務協領王鎮雄密謀佈

置凡十餘晝夜人心始稍定生平喜爲人排難解紛性慷慨好施與所獲貲財前後不下數萬金入手輒盡有故人子歲暮告急無以應解身上狐裘與之其他多類此尤篤於內行兄弟早世者其孤弱撫如己子長爲婚嫁有所得餽物皆分頒之無私蓄焉晚主講義學嗣爲學海堂學長其教人經學專主漢儒於考亭頗事攻擊年八十餘能徒步行數十里同治庚午科鄉試

恩賜副貢生今將軍長善以封耆宿多聞延纂駐粵八旗志事屬創始凡三年稿粗具而卒年八十有八所著有

三朝御製詩注纂論語註商大學集解讀孟稽疑續南海  
百詠海語閣日記樸菴筆記樸學山房文集轍北  
帆南詩草鵬尾集子鍾秀癸卯科舉人太湖同知  
少子鍾彥字子美性聰穎好博覽能承其家學詩  
近體尤擅長時文試未復鬱鬱無所試遂多病少  
愈則與二三同研搗酒出北郭遇有佳處輒流連  
日夕乃返一夜夢至一僧院松栝數株月色滿地  
內經聲琅然徘徊間一僧出謂之曰浪遊二十餘  
年尙不知返故山乎遂驚而寤心甚惡之因賦秋  
懷詩有絲筆任教能繪日青鞵祇合老荒烟之句

先封歿年二十二

張慧字穎軒漢軍鑲黃旗人幼篤學通滿文考補  
隨印外郎在將軍印務主稿數十年公事無誤道  
光二十三年駐防改試繙譯滿洲八旗設立義學  
延爲教習不數年子弟領鄉薦成進士者皆有人  
咸豐初因疾家居年餘病痊復爲漢軍義學教習  
與韓國斌同譯二十一史約編卒年七十子品煥  
同治庚午科繙譯舉人

吳起微字南華漢軍鑲黃旗人爲詩初效李長吉  
晚歸平正嘗遊羅浮與華首臺主僧秋海倡和其  
還秋海寫梅贈之並題句云大句纔邀梅一笑半  
瓢留住月三更其風趣可想有松友堂詩集四卷



子嘲集四卷彈鋏餘錄二卷

官世剛字友石漢軍正黃旗人詩筆清俊西關文  
瀾書院詩會以菩提紗命題詩卷數千延南海謝  
蘭生庶常評定甲乙徐榮第一世剛亦居前列嘗  
遊羅浮於合掌巖前恍有所遇同遊者弗覺也歸  
未數日無疾而逝年甫二十餘聘妻范氏矢志守  
貞後蒙

旌表

朱洽漢軍鑲紅旗人諸生文筆高簡詩苦硬學陳  
後山粵秀書院山長番禺邱先德亟賞之有燔餘  
草一卷

趙國政字以德漢軍鑲紅旗人性樸雅中年妻卒  
不復娶築室於粵秀山側曰秀坡精舍與二三同  
志結吟社唱酬最夥

張廣恒字子寬漢軍正黃旗人讀書務心得中年  
後耽禪理多方外交南海諸生陳心畬多採其詩  
入苧村詩話中

紀秉均字信夫漢軍鑲紅旗人屢困童試及補諸  
生年已四十餘好遊山水其佳句有凍林描瘦月  
寒淥洗荒烟榮遇早輸名士貴詩名今見布衣尊  
等句爲時所稱子世材亦諸生

高仁字志山殿臣長子資性穎秀工書法年十八

取入郡庠爲文幽異自喜越華書院山長陳鴻墀  
深賞識之鄉試連薦弗售鬱鬱得疾卒年二十有  
七其從兄榮亦力學道光乙未舉於鄉赴禮闈不  
第歸卒於涿州

保天福字東海漢軍鑲黃旗人道光癸卯舉人性  
開朗與漢軍閑散尙杰同精涉禪理尙機鋒四出  
辨才無礙天福時出一語微妙獨參二人者不相  
下也中年後閉關謝客壬戌歲忽入都赴禮闈不  
第歸未幾卒從子熊兆事親孝篤學爲文光緒丙  
子舉於鄉年甫二十三感心疾遽卒

劉彥昌字吉堂父勲見懿行傳彥昌性穎悟工書

法十三歲能書徑尺大字爲宋爾炯所賞道光癸卯學使李棠階取入郡庠第一會停文試改習繙譯一時同學者無出其右已酉鄉試閱卷大臣愛仁得其卷以爲甲於各省駐防傳觀四座屆期取卷進

呈倉卒覓其卷不得遂取別一卷代之後愛仁深以爲恨未幾卒年三十二

唐暄字煦堂漢軍鑲白旗人少孤事母盡孝好讀書將軍福增格極重其人與爲文字交書法出入南宮香光閒興到揮灑友人見輒持去非其人雖以勢要臨之弗獲也閒以禿筆寫芭蕉亦彷彿徐

青藤有李樂者鑲藍旗人亦善書與暄同時有二妙之稱

李德峻字明甫漢軍正黃旗人專精書學行草尤有古法先時唐暄以書名譟一時德峻有過之無不及也今海幢寺廊有碑爲金宮詹牲撰文德峻楷書

郭殿雄字樹屏漢軍鑲藍旗人書法娟秀將軍宗室果齊斯歡書多殿雄代筆今機巷大悲寺榜其所書也

賽豪滿洲鑲白旗人貢生兆麟之叔也其母夢一僧入室而生資性穎慧五六歲讀書過目成誦偶

聞人誦般若心經大愛好之因是研究內典及長  
不願娶室以母在不忍出家與峽山寺某首座最  
契一日出門遍別親友歸拜母畢跌坐而化年甫  
二十餘親友會葬者返至茶亭小憩則見賽豪向  
人作禮卽之忽不見云生平不以畫名又絕無師  
承嘗用白描法自繪小像作僧伽狀長身玉立又  
繪其生平禪悟諸境人物衣褶俱合古法筆細如  
髮氣韻生動雖歷來諸名家無以過信乎奇人不  
可測也

董茂泰漢軍正白旗人畫山水人物尤工著色得  
宋元名家法生平不輕爲人作流傳最少有釋迦

成道圖一卷在海幢寺耕織圖十二幅在其友劉承緒家子郁文官正白旗防禦

陳守健字剛中亦正白旗人畫山水喜潑墨法長屏巨幅揮灑淋漓惜拘於閩派不能力脫窠臼云陳廣祥號雲山漢軍鑲藍旗人寫花鳥所居近粵秀山紅棉最多花時布席賞玩其下故紅棉尤工遠近求寫今佛寺道院最多遺蹟云

### 醫術列傳

崔東嶺漢軍鑲白旗人精於醫制軍某患怔忡百醫莫療延東嶺往診曰此中氣弗攝橫衝肺胃閒須緩治之非一季不能除也苟欲捷效藥三劑可

立愈但雨載後不復可救耳制軍曰時方多事何暇緩治朝愈夕死可也東嶺乃用清劑通其上扇熾炭床下重衾臥其上食頃汗流浹體病若失後二年果薨於位餘治人效多類此乾隆丙午丁未閒瘟疫大行東嶺爲藥並刊方救人無算子君培尤名著一時

崔君培字晉榮行七人皆曰崔七性穎悟讀書數行並下承其家學於古今醫家之書靡不究極又好爲深湛之思常經旬不齷櫛其專精如此旣而入都從京師名輩講求如是者又數年其診人善辨生死不可爲者雖行動飲食如常亦不爲立方



可救者雖一息僅屬投以藥無不愈用藥不拘當品以意爲之但取物性相制其效如神治傷寒尤妙粵人至今盛稱之惜乎其著述不傳也

張如芸漢軍正白旗人雲南解馬之役歸途染瘴癘遇一道人投以藥遂瘥並遺以方書一卷歸以其方治人有奇效人呼爲張一摸謂其隨手立愈也

朱靄字青田漢軍鑲白旗人與兄靄同嘉慶己卯舉人屢試禮闈弗售道光甲辰大挑二等咸豐癸丑選奉天府開原縣訓導以時方多故道途遼遠謝病弗就生平精於醫學南關杜氏之母年近七

十起居無恒日脯卽通體潮熱延霽診視立方用石膏八錢柴胡一兩二錢其子駭視之曰家母年邁且染疾幾及一載先生用此大涼之劑何也霽曰君母雖年邁然診尺脈甚實又平時多厚味填溢胃鬲諸醫不審脈源輒因其年邁力投補劑以致陰氣弗通乘夜卽發故潮熱弗止茲余用下通上升獨劑故常有效遂服之一劑熱退安眠再劑全愈又董氏之婦染患痧證其痧深陷弗起投以青黛引諸涼劑而口鼻流血證將不起延霽診之曰此爲重用寒涼之劑所誤當用附子肉桂炮薑重劑以起其陽痧證可消也服之果愈又王氏老

婦大便澀結憊甚三月始一通羣醫皆以爲奇證  
嚮往視之立方單用桔梗四兩一服卽通沈疴若  
失衆請其故曰此醫者因其年老遂多用滋補之  
劑以致下部愈爲否塞桔梗性通利上達故單用  
之上導其氣則下自洩焉不見茶壺乎淪茗滿注  
蓋上若不通一小孔其茶不能出口也衆爲之渙  
然其他老人傷寒小兒驚風孕婦血崩諸險證經  
其診無不立愈卒年六十餘

袁綬漢軍鑲藍旗人精於醫人有疾求治者予藥  
取值僅銀一錢服之立愈弗可治者則弗予藥遠  
近皆呼之曰袁一錢先生

王廷相漢軍鑲白旗人業儒兼習醫專精小兒痘科嘗謂小兒痘毒固宜清解然不可用峻劑內傷其藏氣如趙賓陽之說又多以酒麪雞魚發之亦非也其治痘證不過據本事方用捻金散四君子湯加黃耆狗虱七枚研細末酒服而已亦兼治雜證海關樞使司閩高某患噎隔證上下如分兩截痛不可忍諸醫束手延廷相治之僅用蘇子五錢煎湯一服而瘥

楊廷耀字弼堯漢軍正紅旗人業儒父書經故精醫理遂承其家學年三十喪偶不娶終日靜坐閒出爲人治疾旗地境夏閒多患痧證廷耀治之尤

稱得法云子裕孫增榮皆諸生裕亦工醫

技擊列傳

謹按騎射爲旗人本業驀險衝堅挽強命中人皆  
肄習送人多精能等諸鄒魯之文儒東南之竹箭  
將欲傳之雖累牘連篇滋多罅漏矣故援粵鋪燕  
函之例概從闕略其以技擊擅名者則閒著見於  
篇焉

井滿漢軍正紅旗人精技擊嘗於僧院試其法足  
所騰蹕院磚漫地碎裂有怨家於風雨夜舉刃刺  
之十發不能中嘗於雙井街遇無賴數輩欲試其  
力遜謝復強之適旁有一牯牛滿曰以人試勇非

法也以牛試之可乎衆曰可奮拳一擊牛立倒地視之脅骨斷矣又張茂德鑲黃旗人足縛三十餘觔鐵能飛躍十餘步

李茂揚漢軍鑲黃旗人領催其隊下有逃丁某偵知在西郊外黃沙與諸無賴聚博塲中茂揚親往捕之衆懷刃以出茂揚笑謂曰某一人耳何在衆敵然聞汝曹中有吳阿乾者膽勇無雙欲一見之一人挺身出曰某是也君意何爲茂揚曰請與汝角勝則以某氏子還吾負則任汝曹所爲何如其人曰角力耶角技耶曰角力時村前一神祠乃趨至前楹以肩向庭柱一撲屋瓦震動柱離礎二寸

餘衆大駭服遂引逃丁以歸

郭士琳漢軍鑲黃旗人少孤姿貌韶秀年十三四時從塾中歸路遇惡少凌侮之訴諸其母相對泣一老道人在門外謂其母曰夫人毋悲吾現居三元宮能令公子從吾學一年必令雪前憤母許之乃引歸煮藥水數斛滿巨缸令裸蹲其中數旬筋力暴長遂教以存神導氣及技擊之法後諸惡少遇之皆鼠竄光孝寺門扉高逾丈重四五百斤郭與寺僧狎戲除左扉卧於地僧十餘輩莫能扛復請郭郭隨手舉扉還故處粵海關監督有家丁鐵牛至愍猛稱無敵手聞郭名邀與相角甫交手鐵

牛頓踏山是遠近號之曰粉金剛有丐嫗乞錢於市與人詬爭郭亦在其間嫗忽叱郭曰粉金剛卽汝耶吾特索汝鬪耳郭怒欲撻之嫗遽以指點其胸立仆地數之曰脆劣兒一無所能敢縱橫五羊城勸爾今後宜斂戢唾其面而去郭良久扶掖始起後蹤跡是嫗四處無之歎曰此殆觀音大士化身度我乎遂折節改行終身不敢言勇以壽終

貞壽列傳

謹按婦女編入史書自范蔚宗後漢書始良以扶持風化所繫頗重我

朝化行遠邇廣州駐防八旗皆世守醇樸孝婦貞媛



後先輝映茲以貞壽賢母節烈孝媛見諸章奏者  
編爲列傳以示表彰之義其青年守節別無事跡  
則皆著於表焉

鑲藍旗滿洲防禦巴克灘布之母于氏生乾隆三  
十三年戊子正月至同治六年丁卯正月壽屆百  
齡廣州將軍慶春疏言壽婦于氏持躬淑慎教子  
有方脩齡克享百年荷

雨露之慈後嗣其昌四葉衍孫曾之慶洵稱人瑞宜沐  
天恩奉

旨賞銀三十兩自行建坊于氏生子六人孫二十有五  
人長子巴克灘布防禦次子三音布協領後年一百

有二歲乃終

正白旗漢軍驍騎校高上奇之妻王氏生於康熙三十九年庚辰九月至嘉慶四年己未壽登百齡將軍奉恩輔國公宗室崇尙恭疏

題請

旌表部覆照例

賞銀三十兩建坊

正紅旗滿洲已故前鋒色勒春之妻王氏生於乾隆四十三年戊戌十月至光緒五年己卯壽登百齡將軍長善副都統尙昌懋吉和於光緒五年恭疏

題請

旌表禮部於光緒六年疏請以王氏現年一百一歲照

例請

賞銀三十兩建坊十月初八日奉

旨壽婦王氏著加恩賞給上用緞一疋銀十兩餘依議

欽此

鑲藍旗漢軍已故原品休致防禦李榮之妾委署  
驍騎校李枝豔之母閭氏生於乾隆四十九年甲  
辰正月至光緒九年壽登百齡將軍長善副都統  
尙昌懋宗室鍾泰恭疏

題請

旌表部覆照例請

賞銀三十兩建坊奉

旨依議欽此

孝烈列傳

正黃旗滿洲孝女二玉原任涼州副都統全泰之  
女母瓜勒佳氏久病牀蓐勢將不起二玉焚香禱  
告神明願以身代隨用刃刻左臂肉雜藥以進母  
尋卒二玉遂以死殉將軍長善副都統果勒敏恭  
摺

奏請

旌表同治十三年奉

旨賞銀三十兩建坊其節孝祠內題名設位著工部照例遵行乃建坊於大市街

瓜勒佳氏正藍旗滿洲甲兵沙精阿聘妻母早卒父病經年醫藥罔應氏禱天割股和藥以進父尋卒哀毀盡禮沙精阿有疾將死氏聞之請往侍疾未旬日沙精阿卒因仰藥以殉後里人有禱輒應又孟佳氏鑲黃旗滿洲甲兵國仁之妻夫死自縊以殉鑲紅鑲藍旗協領關祥之妾溫氏關祥卒溫氏服毒以殉

瓜勒佳氏正紅旗滿洲甲兵札郎阿之女年十七適正藍旗前鋒五十七婚甫兩月五十七以鬪殺

人下獄論辟絕無旁支其母憐之欲奪其志不從  
遂剪髮矢志歸母家奉母以孝稱撫兄子全祿如  
己子年八十三乃終全祿今官正黃正紅旗協領  
余呼魯氏滿洲鑲藍旗繙譯生員塔親布之妻咸  
豐四年紅匪之亂省垣戒嚴塔親布派守永康臺  
病歿於軍氏年二十有二生子甫周歲數月復產  
遺腹子時翁姑在堂家素寒窘氏拮据奉事未幾  
翁姑相繼沒氏一人獨任殯葬督子夜課恒至宵  
分年未五十而卒

伍氏福建汀漳龍道漢軍正黃旗徐榮之妾常州  
陽湖人咸豐五年徐榮督兵於安徽漁亭戰歿返

櫬同浙伍氏迎喪於江干送至湖庄歸寓卽投纒  
殉節浙撫奏報奉

旨徐伍氏貞烈可嘉著照例旌表賞給建坊銀兩載入八  
旗志貞烈列傳

馬氏鑲白正藍旗漢軍協領張陞和之妾咸豐七  
年洋人闖入省垣陞和領兵接戰陣歿氏聞之令  
陞和之子統領部卒赴東城尋覓其尸未知所在  
乃出兼金募人得之城下三娘廟中氏躬視棺殮  
畢卽闔戶投纒以殉

林氏正白旗滿洲甲兵特依順布之妻咸豐七年  
十一月十四日洋人力攻省城特依順布防守東

城氏遞送糧食爲洋礮猝傷而卒

小美鑲白旗滿洲甲兵舒伸之胞妹洋人闌入省垣小美恐遭辱闔門自縊

孟氏正黃旗漢軍水師兵潘秉功之妻洋人攻省垣潛踰城北隅而入紛入閭里孟氏恐遭辱被髮繞宅後池塘號哭投水而死

張氏鑲藍旗漢軍武生邊洽之妻洋人入城張氏護其姑出走已乃抱其幼子偕兩姪奔宅後菜圃魚池踊身投入時隆冬水涸未及膝氏匍赴池心以首沒泥淖中移時氣絕後出其尸母子猶互相抱其兩姪亦死於其側長姪名世霖僅六歲次名



槐霖甫周歲均甲兵邊魁之子

倪氏鑲紅旗漢軍甲兵秦滔之妻洋人入城時倪氏牽幼女六妞赴門右菜圃魚塘同投水死

以上七人經將軍穆克德訥副都統庫克吉泰具

奏奉

旨張馬氏給銀三十兩建坊旌表林氏小美孟氏張氏倪氏六妞均准其旌表總建一坊乃建於德宣街斗姥宮側焉

十七姑者鑲黃旗漢軍劉清之女性柔順善事父母父母絕愛之及笄許字吳氏清久病弗愈十七

姑剪髮燔香禱天願以身代清果愈未洽旬十七姑遽歿其家世享祀之

李氏鑲黃旗漢軍李發之女許配本旗張茂發子將娶前數日張子忽病死女聞之願往守節父母不可遂矢志不嫁在室奉養其親以終

于氏正紅旗漢軍于文潤之女許字正白旗漢軍文生員王應達道光二十三年應達病卒于氏年十六矢志往夫家守節代夫養親婦兼子職及翁姑沒後于氏積感成疾咸豐四年卒年二十七五年追請旌表照例給銀肆坊焉

光緒十年續修補文學傳

劉彥揚字以言一字芝山漢軍正白旗人勅第三子性和緩處事從容不迫年十七入郡庠後益致力於學嘗從南海何文綺遊得其指授爲文苦思力索務期矜鍊不屑苟隨時趨門內諸父昆季在庠者十餘人皆久困場屋至同治元年壬戌

恩科駐防旗人仍許應文試乃與其弟彥明同試高等食餼是科嘉應州牧周士俊爲同考官盤屋路德門下士也得彥揚卷大加獎異決爲宿學之士力薦之遂領鄉薦甲子其弟彥明繼之丁卯其出嗣子俊又繼之鄉里稱盛會試歸適其座師郭祥瑞官

廣東督糧道延入署中課其子姪數年兩廣鹽運使方濬頤延請課其孫歲戊辰同文館主講需人將軍慶春聘爲總教習悉心訓授生徒多能通達文藝應鄉試膺保薦今出使外洋如蔡錫勇左秉隆楊樞沈鐸其尤著也彥揚亦得循

例請

獎加內閣中書銜生平無他嗜好晚年惟喜作字講求古人用筆之法精益求精行書入古大有晉唐人風格然深自謙抑未嘗輕以示人亦不欲以此表見也長其弟彥明九年彥明讀書爲文自幼得其教怡怡友愛老而益篤光緒八年三月卒年六

十九長子俊丁卯科舉人出嗣其長兄彥光次子  
僎郡庠生補用八品筆帖式俱先卒

劉士忠字以孝一字希夏漢軍鑲黃旗人少孤天  
性純篤竭力事母宗族稱孝幼穎異好學年十五  
補博士弟子員時南海馮國倚主講八旗義學士  
忠篤志從遊二十年稱入室弟子道光丁酉舉於  
鄉會試歸授徒以養母詩文俱樸實老當言動皆  
有禮法與人交坦直無城府主講鑲紅鑲藍旗義  
學兩旗子弟文風由是而開同治辛未年逾六旬  
入都會試值大挑之期亦不赴挑下第後赴部報  
截取而還光緒元年修駐粵八旗志分纂人物傳

晚年深究醫書辛巳秋忽得痿痺之疾年老氣衰人皆危之處方自治未幾復能步履次年壬午科子安科領鄉薦後乃無疾而逝年七十一論者咸以爲生平爲善之報云癸未歲試其長孫亦以幼童入郡庠著有詩文集各數卷皆已刊行

駐粵八旗志卷二十四目錄

雜記

附錄旗境故蹟

駐粵八旗志卷二十四

阿克敦滿洲正藍旗人康熙己丑進士由編修擢禮部侍郎兼國子監祭酒雍正四年四月兩廣總督孔毓珣疏請入

覲

上命往署總督兼察勘將軍李枋與巡撫楊文乾互控事畢卽授廣州將軍未一載補授兩廣總督嘗書將軍大門楹聯云銜恩特簡分龍節捧日榮頒在禁林至今仍用其文云

傅玉滿洲鑲黃旗人大學士忠勇公傅恒弟乾隆四十年由杭州將軍調任廣州先是永豐倉米多



霽變兵米尤不堪乃札督糧道命官俸上白次白  
兵米四者務令如式旗人有罪犯向止交南海番  
禺兩縣羈所監禁前任將軍宗室永瑋

奏請置旗獄已擇地矣傳玉視之曰牢獄不當處吉  
方不聞京師諺乎土堆翰林院水窩刑部監遂擇  
北門內地建焉

宗室輔國公崇尙嘉慶初爲廣州將軍署內曩有  
關帝廟兵士一人司香火除夕見之訝問胡尙不  
歸兵士白以避債問所逋幾何曰四五緡耳乃解  
身上袍與之命付質肆袍乃四開衩者肆主不敢  
質詢知爲將軍物餽銀十兩以袍還之兵士明日

白將軍將軍笑曰昨我適乏耳命另取銀償還焉  
安華漢軍鑲白旗人雍正七年由鑾儀衛冠軍使  
擢廣州右翼副都統乾隆元年攝將軍篆南海令  
魏綰詳言前藩兵侵占學宮地蓋造房屋數十間  
今屬旗境現修學宮地基狹隘請

奏明復還舊址華令繪圖呈驗的實二年秋具

奏奉

旨俞允並發給庫帑按閒給值俾令遷徙焉

張秉樞漢軍正黃旗人世襲一等靖逆侯嘉慶十  
四年爲廣州漢軍副都統公餘唯好讀書與南海  
謝蘭生庶常往還蘭生粵中名宿也故將軍明俊

靈櫬北歸其家奴二人素强悍秉樞乃預爲印文  
付送樞章京曰將軍夫人與兩公子長途孤弱二  
奴儻有違忤可卽細縛並印文解地方官自必嚴  
治二奴聞之途閒倍加馴謹焉

嘉慶十三年九月英吉利兵目都路哩者聲言法  
蘭西欲爲變藉保西洋人爲名領兵七百人澳門  
占踞東望洋娘媽閣伽思關各礮臺又洋兵三百  
占居三巴寺先後列礮船九逗遛數月督撫匿不  
以

聞

上訪聞總督吳熊光巡撫孫玉庭革職將軍陽春亦緣是

解任陽春滿洲正白旗人由福州將軍調廣州先是旗人多鬪毆之案署東轅門外有觀音閣雄峙路口初抵任見之亟命拆去自是其風少熄蓋陽春夙精堪輿云

達春蒙古正藍旗人由筆帖式充方略館校勘陞中書科中書游擢工部員外郎乾隆四十一年授廣州漢軍副都統精騎射嘗跨馬疾馳遺鞭於地俯身拾取之仲冬燕塘演礮暇率小隊携榼梅均探梅訪蒲澗濂泉之勝泉側有磴道高百尋達春攝衣直上疾如飛隼軍士從登皆喘促汗流焉嘗過清遠峽船頭賞玩山水不覺叫絕失足落水中

舟子拯之得免生平尤工填詞云

高明章字品松漢軍正紅旗人性英敏有文武材  
由印房章京洊擢至鑲黃正白旗協領乾隆閒蘭  
州逆回之亂事平後從逆家口發廣州旗人爲奴  
幾三百人鑲藍旗金氏分得一奴名阿哩子者引  
其黨馬四兒夜戕其主持刀而出勢甚獷猛衆莫  
敢近時明章方赴將軍衙遇之於途二奴舞刀競  
進明章顧左右取長矛刺之一折其脛一貫其睛  
遂就縛焉將軍命以以示衆由是諸奴皆震攝畏  
法明章素嗜書尤工擘窠大字好爲詩所著有粵  
麓山房詩集四卷

石柱滿洲正黃旗人乾隆二十三年由驍騎校奉調駐防值端陽節出城觀競渡入一村有村人登樹采荔子失足落石岸上頭破肢損奄奄路側石柱乃命人取水一盃至前戟指書符默呪數遍乃吸水嚙傷者隨以水洗其傷口血流頓止令傷者吸水咽之取五月艾菖蒲根生桑葉擣合敷之曰無傷矣三日傷者果愈

倪呈璠漢軍正藍旗人乾隆三十三年正白旗防禦偶以事忤上官上官多方倚撫會往柳州採購馬匹歸上官驗謂馬多瘠弱責令賠養臙壯始收乃變產搭蓋棚廠市芻豆躬自秣飼凡三月始呈

繳幸無事遂具牒辭職不告家人出門不知所之  
道光閒有旗人某往羅浮遇一道人古松下自言  
姓名其人歸以告其後人入山徧訪之不復見計  
其年蓋百五六十云

鄭大師不知其法名本漢軍正黃旗鄭氏子人皆  
稱之曰鄭大師云垢面赤足冬夏一布衲每得錢  
則沽酒市犬肉飽啖或經旬不食夜則寄宿叢祠  
中亦無定止每出路上羣小兒譟隨之一日忽詣  
所識某謂此閒俗緣已了某日當行期於粵秀山  
下一別遲恐不及待及期某果往見鄭合掌跌坐  
樹下石上已瞑目化矣道光五六年閒事

楊純漢軍正白旗人姻習

國書爲左司滿稿房外郎時有城守尉巴雅爾者在  
金川違悞軍火謫廣州駐防披甲當事者優待令  
充左司委員與純頗相得因傳純以射法並傳其  
束縛肢體立能善射之法其法用絲縑長數丈左  
右縛束其肩肘背膊授以弓矢宛然夙昔一釋其  
縛無復能爾矣

朴秀字君實漢軍正黃旗人精算學宗西法嘗謂  
古人以弧矢立算原出於句股其法必用三乘方  
取數不易惟西人以弧角八線相推謂之弧三角  
法亦出於句股然其人算也僅一乘除視弧矢之



古法簡而便矣猶慮乘除之煩也則又有八線對數比例法化乘除而爲加減則又便之便矣秀乾隆閒人時粵中講算學者尙寥寥也

朱有孚漢軍正藍旗人精風鑑相人多奇驗人呼之曰朱大仙嘉應宋湘少時未知名落魄羊城有孚一見謂之曰君善自愛將來必擅重名不止富貴後果舉鄉試第一由編修出爲雲南迤西道調湖北糧儲道詩文書法擅名海內云

乾隆四十八年兵部來文調廣州水師旗營熟悉水技兵數名赴奉天金州海城教習水技將軍命王昇李榮馬旺三名往教習二年

盛京將軍

奏加獎勵

賞銀五十兩同粵以驍騎校補用王昇於五十三年復出征臺灣有功後歷遷正白旗防禦李榮鑲藍旗人能泅水底踰刻乃起在金州教習水軍時屆深秋猶裸體海潮觀者駭嘆後至正白旗防禦馬旺亦鑲藍旗人嘗迎迓新任將軍永瑋於韶州時滇江暴漲急溜如箭一舟子失足落水瞬息里許旺躍入中流拯而出之後亦官鑲紅旗防禦

張禧明漢軍正黃旗人少研究內典年三十卽屏家室獨居一廬嘗於白雲山景泰寺建一塔刺血

書金剛蓮華經藏其內乾隆閒將軍署建

御書閣唯禧明所選日辰最吉乃用之焉年踰六旬預知死期其子孫皆傳其星學堪輿頗行於時

劉起雄漢軍正紅旗人家素貧以善營運後業饒致富一子爲武生早卒晚年遂捐家財徧修旗境道路及各神宇今惠愛大街自西門至拱宸街止皆其所修後復舉一子名憲爲諸生

蕭光兆漢軍正藍旗人性狷介不與人交善天文算學道光中偶將軍出欄輿控時憲書明歲節氣有差訛推當某日某刻將軍以其人類狂叱去之未幾欽天監果自行檢舉

奏明更正焉

將軍署本靖南藩邸規制宏壯大門外兩巨石獸以肇慶七星巖石爲之瑩白如玉鏤鏤精絕大堂及階前石欄四周刻鳥獸花草皆隱起無一複者署西北正對六榕寺浮圖形家言不利居者相傳康熙中將軍拜音達禮年

觀歸道出廣信謁張真人將求符籙厭勝有一黃衣道人跌坐南楹真人指謂將軍云此師有術將軍乃與爲禮道人索紙筆書泰山石敢當五字字大逕尺末題純陽子書遂刊石立諸東廊署西偏太湖石一高丈餘玲瓏戍削旁有天啓中刻字亦奇石也

後樓九楹高十餘丈咸豐八年燬於火二堂有蝙蝠

數千飛不避人今亦不復見矣大堂後有康熙

二十七年廣東將軍王永譽題名碑廣州將軍府題名碑記五

嶺以南廣州為一都會西控牂牁北滙湟武東跨

龍川二三千里間其安危常繫於廣州廣帥得其

人則一邊盡治有明之世嘗以一都督總兵鎮之

而屯衛之軍則屬之都使司並聽節制於兩廣總

督其或有所征討然後命將軍佩印以出廢置無

常員我

國家平一字內兵不留行而嶺海之間獨煩再駕平南

靖南二藩率師環攻歷九閱月然後克之

世祖章皇帝因命兩藩留鎮末年移靖藩於閩中

今上之十二年命撤雲南廣東福建三藩之師踰年而滇

閩逆節交偏廣州十五年春廣州亂明年夏平南

副藩以廣州歸正十九年為其下所告其冬

命撤其眾歸於京師二十年臣不佞特奉

簡命為鎮守廣東將軍領禁旅三千與副都統二員協

領八員參領八員防禦四十員驍騎校四十員同

事於廣州廣州內城舊居兩藩兵目眾多舉凡有

司之署四民之家皆權移於外二十一年奉部文復官署於內城兵民東西分居不令相雜自歸德門以西爲旗兵居焉比歲又改左右翼鎮四千人屬之將軍標下分左右前後四營每營遊擊一員守備一員千總二員把總四員蓋翼鎮之設昔隸於藩今而改屬將軍固其宜也今按

今制

十五京省之大有將軍者六江甯陝西荊州浙江福建廣東皆重地也夫提鎮經制之兵棋布於天下節之以制府綏之以撫軍固足以收甯中外防患未然猶往往用禁旅將軍之重爲之鎮守若無

廟堂

之上籌之審矣京師居重馭輕之勢東南內地雖

朝廷

無所用其防閑而四方耳目相承一旦盡撤諸藩則若覺其濶略故慎簡親賢分遣精銳落落然參錯其間若五岳之拱太陽股肱之承元首於以昭

皇圖

之鞏固任綦重矣臣實何能足當其選賴先將軍向曾節制兩粵遺澤在人七載於茲差免瑕咎今

當赴

闕之

日念廣東之有將軍予爲首任得與二三英僚朝

夕斯堂綢繆謨議而外讀書說劍作字賦詩入奉母夫人溫清定省之權出接紳士大夫文酒過從

之樂皆有不可忘者此坊舊名貞烈衙署建自靖  
藩平南嗣藩益增修之其改爲將軍府自予始也  
古者百官聽事皆有題名之石所以勸戒將來余  
不敢昧斯義謹書氏籍於左方嗚呼慰

九重南顧之思當萬里長城之寄可不慎哉可不慎哉  
時康熙二十七年歲次戊辰仲春穀旦  
鎮守廣東將軍加一級世襲一等阿思哈尼哈番  
建州王永譽撰

六榕寺浮圖瑞光前明邑人黃衷述其異甚詳然  
不常見也聞今士子有讀書寺中者見之是科必  
捷咸豐六年七月十三日夜二鼓後倏有風自西  
來浮圖頂寶珠隕落於地十四夜人定後塔內忽  
紅光絳然如火上下通明俄頃遂熄繼又復然如  
是者三後屢議興修弗果至同治十三年今將軍  
長善與督撫估工重修委員董其役自七月興工

至次年五月落成穹窿嶺峯煥然一新將軍與巡撫皆有碑記其事

靈巖香海在粵秀山左麓爲道光間將軍慶保所築迴廊窈窕巖石參差上有羣玉山房梅花數百本高下環繞花時香襲襟裾頗極登覽之勝咸豐初總督葉名琛其父迎養在署崇信卽衛改其處爲長春仙館金碧相暉倍極偉麗紳士之無賴者簪冠道服鑽營住持其間以誘惑愚民饒鼓不絕不五六年而洋人入城全爲所踞事定後巡撫蔣益澧復改爲菊坡精舍置膏火以課士三四十年間滄桑遂屢易矣



得勝關帝廟在北郊里餘高岡上二廟東西相望  
東曰東得勝西曰西得勝順治己丑庚寅間

王師屯營於此因建廟今歸旗人經理焉

任邱鄆州扁鵲祠俗名藥王廟相傳四月廿八日  
爲神誕期康熙中駐防官兵建祠祀之仍曰藥王  
廟招僧人司香火叅領陳萬國有碑嵌壁間歲入  
頗豐咸豐間僧徒石崖欲圖占之經官詳勘逐去  
僧人另招復以旗人退老者同司其事焉祠在大  
南門外西橫街

先是燕塘演放大礮畢必領馬隊打圍附近四五  
十里所獲麇兔山豬野雞等類歸以餽同城官餘

始分散軍士後以蹂踐田塲民多弗便乃

奏請停止今將軍副都統回營猶遣員採購山狸野  
雞分餽各官本故事也

羊城燈市以旗人所製爲最夥且又最工人物禽  
魚花卉器皿無一不備多綾絹或蓮草爲之五色  
鮮妍璀璨奪目蓋封印後兵有餘閒藉此稍獲贏  
餘爲新歲欸接親賓之需亦承平佳事也

漢軍鑲白旗境官塘街北地窪下每春夏積雨潦  
水瀾漫頃餘或以爲古芝蘭湖者非是近三四十  
年水漸涸左右居人遂建屋其地旁有老榕一株  
數百年物也一枝東向挺出長數丈宛宛如龍然

正迎日出自建屋後其枝遂枯樹亦無復舊時蒼

翠矣

芝蘭湖在北門外雙井街西今其地尙有古石刻蘭湖里三字舊南海志不誤

大北門內茶樹巷口有一家會天旱呼工浚井內有鐵紐甚鉅試使曳之堆滿一院猶未盡懼乃納還井中迄今不知下尙有何物

協領廣德家有一白瓷香鑪傳數世矣云浚井所得每焚香煙一縷直上散成羣鶴翔舞盤旋良久乃滅惜亂後無存

西門大街金剛巷左居人築牆取土露一銅佛其首如巨甕懼聞於官復掩之道光初年事

乾隆五十七年有俄羅斯越界番民莽素者發配

來廣人鑲藍旗管轄其人碧睛鬚鬚拙直無他長  
協領蕭沛霖令在署司啟閉後爲納婦生一子名  
成龍令學騎射入廣協管充伍未幾以軍功擢把  
總云沛霖鑲黃旗人

道光二十二年漢軍鑲紅旗馬甲兵柴德名妻張  
氏一產三男

某防禦家畜一犬一日門外有聲喚賣糕者犬忽  
效其聲喚宛然小兒方嬉戲其旁駭以告主人伺  
之翌日賣糕者過犬復效之主人笞之後亦無他  
異

漢軍正紅旗張姓家一棗騮馬滇產也而高大異

常日馳數百里每武闈試士子馬射競乘騎之遂  
以致富其馬善解人意非主人躬秣飼弗肯食云  
西城內城根一小巷人家掘地得一石高二尺餘  
光瑩如鏡人照之中見人物各異以占休咎如前  
代卦影然主事許標母往照見其中堂廡深邃兩  
旁列紅漆金書官銜牌甚夥後標與其子普濟先  
後舉進士孝廉賈培業往照之則見兩月墮水中  
水邊一屋一人坐其中讀書未幾其祖母卒培業  
承重孫也異哉

自辛丑洋人之役當事者召募各練丁二三萬人  
有陸勇有水勇人月餉五六金凡二年餘糜費無

算裁撤後其徒坐食既久散無所資桀黠者遂爲之魁聚黨聯盟曰三合會分布州縣煽誘鄉氓尅期舉事咸豐甲寅六月十一日博徒陳開者倡亂於佛山僞號大甯旬日之間各處徒黨四起連陷數十州縣西至梧州北至韶州東至惠潮南至高廉而省北何子海朱子儀豆皮春李文茂等亦聚衆數萬以江村爲老巢佛嶺市爲營砦蕭岡龍塘觀爲犄角三寶墟爲後應直撲省垣我旗兵與各軍排日出戰自六月至十一月賊黨始盡殲新修南海縣志載其事甚詳因附錄於後

六月二十四日賊越蕭岡趨三元里至北郊我

軍擊退之二十五日賊繞瑤台至青龍橋大破之二十六日賊由瑤台三元里撲紗帽嶺飛鷺嶺竄入西村擊斃無算二十八二十九三十日焚燒西村瑤台三元里七月初二日賊至牛欄岡官軍迎與鏖戰我軍有陣亡者旋擊賊退初四日三元里之捷追賊至三家店初六日義勇祠蕭岡三元里石榴橋之戰俱捷初八日賊由瑤台撲三元里並殲之初十日颶風大雨賊由三元里繞至飛鷺嶺礮臺用巨礮擊退之十六日賊分三路由義勇祠三家店瑤台出我軍亦分三路擊敗之十八日賊一由牛欄岡趨分水

基一由三家店趨松柏嶺迎擊之兩大至賊溺死無算二十五日賊分七路進我兵佯退誘至飛鷺嶺悉斃之閏月初五日賊由牛欄岡三元里瑤台分股至擊敗之初六日賊傾巢出左自蕭岡右至瑤台數百里之外賊亦同至約十萬餘人我兵在三元里布圓陣四面迎敵擊敗之追至松柏嶺義勇祠棠夏等處斬獲無算夜始收兵初八日賊仍分路齊出義勇祠三家店王聖塘瑤台等處擊敗之越松柏嶺而遁初九日賊至三元里迎擊之逾時潰散追斃之並焚瑤台賊舍初十日賊由三家店飛鷺嶺撲白雲菴



雨忽大至我兵暫退至流花橋賊冒雨來礮臺轟擊之潰散適雨稍霽我兵進殺賊無算十一日賊樹旗幟三元里樹林外轟擊竄散十二日賊由飛鵞嶺直撲白雲菴窺伺小北門一帶復分股於三元里屐釘嶺兩處接仗我兵分擊之潰散遂盡斬三元里大木十三日賊復至三元里旋遁我兵追斃之十五日賊五萬人欲撲北郊餘皆在沙涌棠夏村庄潛伏我兵由三元里疾出至石榴橋迎擊復分兵截其後路並由分水基勦擊伏賊三路擒斬無算十九日我兵搜北路賊陰雨回至三元里賊數千隨後衝出復

上迎擊追過三家店殺賊不可勝紀二十二日  
賊復來大戰於松栢嶺斬獲無算焚燒瑤台庄  
二十七日進勦牛欄岡逼近賊巢賊匿不出忽  
大雨賊分東西下撲轟擊之乃退八月初一日  
賊由義勇祠蜂擁而來我兵在三元里迎擊敗  
之進攻棠夏焚其賊巢初八日攻破三家店沙  
涌瑤台賊巢焚燬殆盡初十日賊復犯北郊擊  
敗之十九日進逼賊巢搜捕賊堅壁不出二十  
一日進攻至義勇祠斃賊甚多二十三日賊復  
來窺北郊我兵由三元里直進迎敵賊卽竄回  
二十四日進攻蕭岡賊巢焚燬各小鄉賊巢六

所二十五日賊復來窺北郊至雙塔岡我兵迎  
勦賊遁三十日進攻至三家店棠夏義勇祠直  
逼賊巢焚燬西北小鄉賊巢七所九月初一日  
三更有賊潛入三元里擊之遁初五日分兵由  
中路三家店後進攻蕭岡又由中路分攻牛欄  
岡由東路進攻龍塘觀由西路攻義勇祠均斬  
獲無算初六日仍如昨分路進勦俱大獲勝仗  
初七日合兵進攻牛欄岡賊巢立焚燬復斃賊  
甚多餘俱逃往佛嶺市初八日賊駐義勇祠潛  
撲松栢嶺截擊之遁初九日賊仍至義勇祠我  
兵藏蔽誘之至松栢嶺轟發賊狂奔去十二日

分兵進蕭岡龍塘觀兩賊巢蓬廠六百餘座盡  
焚燬斬馘甚多十三日我兵合力進攻義勇祠  
佛嶺市賊壘分六路奮擊礮船由槎頭鈔佛嶺  
市後先破義勇祠賊壘蓬廠佔屋縱火焚燒殆  
盡乘勝攻佛嶺市直搗賊巢礮斃不可勝計僞  
軍務司獄處僞帥府都督府各賊大營二千餘  
全行燒燬搜出僞印袍盔並名簿書函十餘箱  
大旗有僞元帥先鋒都督及洪順堂字共四十  
三面小旗及礮械無算火藥五十餘擔他物稱  
是佛嶺墟場村舍人物一空石井賊亦遠遁十  
八日我兵出隊搜村落至蕭岡有零賊見兵卽

遁二十三日聞蕭岡復有賊嘯聚移兵松栢嶺  
勦捕二十四日我兵攻破陳田鄉賊巢仍遣兵  
由三家店棠夏至佛嶺市有賊迎戰旋遁去二  
十五日我兵攻破江夏鄉二十九日賊復嘯聚  
佛嶺市分九路而來我兵由棠溪棠涌高岡黃  
沙岡棠夏等處分路迎擊追殺十餘里賊潰十  
月初五日進攻橋頭市與賊遇於將軍橋賊竄  
去平其溝塹二十餘里十三日賊復至我兵迎  
擊於分水基追殺至桂花岡亥刻始散十四日  
我兵分兩路進勦白雲山前後餘賊殲之十一  
月初四日分路進勦石井賊於分水基迎拒擊

敗之追奔至白鶴橋十三日分路由烏石岡禾  
沙岡白鶴橋等處進攻石井斃賊甚夥餘賊越  
石井橋遁十四日分兵進勦大埔下茅鶴邊等  
三鄉均破之擒斬甚衆十五日復進攻石井賊  
踞橋苦戰逾時乃遁我兵過橋搜勦擒斬無算  
焚其營寨並蓬寮六百餘間十七日仍分兵進  
勦石井官橋大岡脚鄉等處擒斬不計其數餘  
賊遁十九日仍進勦賊先斷石橋我兵用板囊  
沙分渡石井墟官橋墟大岡脚鄉俱破追至北  
河湖邊殲溺無數燒賊巢一千餘間二十日仍  
搜勦石井賊潛伏將大木深林盡行轟倒殲斃

馬馬方云 卷二十一  
賊人無算二十二日賊復至義勇祠我兵搜捕  
追至石榴橋賊逃匿二十五日賊仍聚昇平社  
學分據勒馬岡我兵亦分路進勦追殺至古料  
岡等村餘賊始逃散自六月至十一月苦戰六  
十餘次而北路始肅清焉

咸豐六年九月洋人復藉端啓釁拆毀沿海礮臺  
西南城外瀕河一帶店戶民居洋樓先後焚燬殆  
盡復晝夜發各種機礮轟入城內自九月至十一  
月旗境被礮以萬計然皆落於空地迸裂者碎鐵  
四散否則入地二三尺間有摧墻塌屋者或人在  
外而礮落於內或人入內而礮擊其外更有奇者

人卧床上礮丸忽穿壁掣其被於地而人不傷其  
火箭所到亦未嘗焚燒一屋故人心始雖震駭後  
亦習之無一奔避者死生有命不信然歟



附錄旗境故蹟

鎮海樓在北城粵秀山朝漢臺右凡五層高十餘丈明洪武中都指揮使永嘉侯朱亮祖建成化間都御史韓雍修治之後燬於火嘉靖間提督張經重修

國初再燬於兵順治八年平南王尙可喜修復之總督李棲鳳增以繚垣爲登覽最勝之地咸豐四年土寇攻撲省垣凡數閱月總督漢陽葉名琛相國與將軍穆特恩日於其上視賊形勢調兵攻勦遂殲衆寇在漢軍鑲藍旗城上今以旗兵守之

越王井在天井岡下俗呼九眼井尉佗時所鑿也

遠近往汲大旱不竭上有關帝廟廟有張桓侯涚像甚威猛在漢軍鑲藍旗境

光孝寺在城西相傳爲南越王趙佗孫建德故園三國時吳虞翻謫南海居此因名虞苑晉隆和中西域僧尉遲創建王園寺宋開寶中改名乾明禪院又名法性寺紹興中改名報恩光孝寺明成化初始改今名粵中叢林莫古於此六朝唐宋名跡尙多存者在漢軍鑲白旗境

戒壇在光孝寺後盤福里劉宋時西域陀羅三藏來粵手創戒壇梁天監中僧智藥自天竺來携菩提樹一株植於壇側唐儀鳳中六祖大鑒禪師落

髮於樹下宋時併入光孝寺

國初復劃爲二在漢軍鑲白旗境

淨慧寺梁大同三年曇裕法師於西域求得釋迦舍利至粵築浮圖瘞於此號寶莊嚴塔唐王勃撰有舍利塔碑宋端拱中始名淨慧寺蘇文忠軾南謫來游此大書六榕二字至今以爲門榜俗又名六榕寺云在漢軍正藍旗境

五羊觀舊在今藩署地明洪武初改遷坡山上祀五仙人手執禾穗曰五仙觀觀中石上巨窪宛如蹠陷長五六尺深三四尺名曰仙人拇蹟有明行省叅知政事汪廣洋所建禁鐘樓禁鐘尙存在滿

洲鑲白旗境

元妙觀本唐開元寺宋改爲天慶觀東廂有衆妙堂舊有蘇軾碑記西院一井亦軾所浚今名東坡井又有僞南漢主劉鋹及二子銅像今不存在西門內漢軍正黃旗境

懷聖寺唐時回鶻山蕃舶來此貿易建浮圖於此高十餘丈光無層級頂有金雞隨風南北以覘風信有懷聖將軍者建堂於其前凡回回人在粵者咸以時往誦經禮拜至今猶然在漢軍鑲黃旗境南宋名臣增城崔清獻與之故第堂廡宏壯其棖棟尙當時故物其街尙名崔府街在漢軍鑲黃旗

境

福地巷在西門惠愛大街擢甲里內明侍講學士  
南海倫文敘世居於此文敘父子俱擢鼎甲故名  
里門外有父子鼎甲坊又志載宋南海黃勛字有  
功有至性博學能文紹興閒登進士第郡守李凌  
素重其學行爲之新其宅題其所居里曰擢甲未  
知孰是在漢軍正白旗境

明總兵官陳璘祠今名興國禪院璘翁源人明史  
有傳從總督凌雲翼征羅旁賊徭斷藤有功祠內  
道光初尙有藤數段其子孫尙於其生辰從翁源  
來祭近今不復見璘塋像面深黑色在漢軍鑲白

旗境

陶街明正德中廣東布政叅議陶成有令績其子魯隨總制韓雍征叛獠有戰功因勅建忠助祠子孫附祠家焉今公衙門祠故址也在漢軍鑲黃旗境

忠襄里舊有祠祀明高廉道毛吉吉諡忠襄故名在漢軍鑲黃旗境

日泉井在內城詩書街龍王廟爲唐都督劉巨鱗所鑿四井之一志以爲在西城外青紫坊者非今屬滿洲正藍旗境

龍起井在仙羊街藏龍里內宋寶祐元年侍讀鍾

顯孫屋後古井有龍昇天時子生取名龍起後登第貴顯井遂得名屬滿洲鑲藍旗境

秦任墓墓今不知其處舊志謂在光孝寺後道光中寺後居人造屋發地見塋甃異常拆之露出一棺甚鉅遂掩之惜無碑誌可考在漢軍鑲白旗境

駐粵八旗志卷二十四終